

# SAMÞYKKT

## um hundahald á Sauðárkróki

### 1. gr.

Hundahald í Sauðárkrókskaupstað sætir þeim takmörkunum sem getið er um í samþykkt þessari.

### 2. gr.

Umsókn um leyfi til hundahalds skal senda skrifstofu Sauðárkrókskaupstaðar, sem gefur út leyfið að uppfylltum skilyrðum.

### 3. gr.

Hundahald er háð leyfi bæjarstjórnar sem getur veitt lögráða einstaklingum, búsettum í kaupstaðnum, leyfi til hundahalds að uppfylltum eftirfarandi skilyrðum:

- a) Leyfið er bundið við nafn og heimili lögráða einstaklings og er óheimilt að framselja það.
- b) Hundurinn skal skráður á skrifstofu Sauðárkrókskaupstaðar og þar fær eigandi hundsins afhenta merka plötu, sem hundurinn skal ávallt bera um hálsinn. Hundaeiganda ber að tilkynna á bæjarskrifstofu um aðsetursskipti. Einnig skal tilkynnt ef hundur drepst eða er fluttur úr lögsagnarumdæminu. Sækja skal um leyfi fyrir hvölp áður en hann verður 3ja mánaða gamall.
- c) Árlega skal bæjarsjóði greitt gjald fyrir þá hunda, sem leyfi er veitt fyrir samkvæmt sérstakri gjaldskrá sem heilbrigðisráðherra staðfestir. Gjaldið skal greitt í fyrsta sinn við skráningu hundsins og síðan árlega fyrirfram með gjalddaga 1. maí. Hafi gjaldið eigi verið greitt innan tveggja mánaða frá gjalddaga fellur leyfið úr gildi.
- d) Skylt er hundaeiganda að hafa hund sinn ábyrgðartryggðan hjá viðurkenndu tryggingarfélagi. Við greiðslu árgjalds skal leggja fram kvittun frá tryggingarfélaginu er sýni að tryggingin sé í fullu gildi.
- e) Hundurinn skal aldrei ganga laus á almannafæri, heldur vera í taumi í fylgd aðila, sem hefur fullt vald yfir honum. Eigi er leyfilegt að fara með hunda í matvöruverslanir eða aðra staði þar sem matvæli eru höfð um hönd. Sama gildir um aðrar verslanir í kaupstaðnum. Bannað er að fara með hunda inn í sjúkra- og skólahús, dagvistar- og dvalarheimili hvers konar, leikhús, félagsheimili, kvikmyndahús, sundlaug og önnur íþróttahús, hótél og gististaði. Bannað er að fara með hund inn á skipulögð leiksvæði barna, skipulögð íþróttasvæði svo og kirkjugarð.
- f) Heimilt er að sleppa hundum lausum á auð svæði og ónotuð, fjarri mannabyggð.
- g) Hundaeigandi skal gæta þess vel að hundur hans valdi ekki hættu, óþægindum eða óþrifnaði. Eiganda er skylt að fjarlægja saur eftir hundinn.
- h) Ef sótt er um leyfi til að halda hund í fjölbýlishúsi, skal skriflegt samþykki allra íbúðareigenda í sama stigagangi fylgja umsókn. Sé um að ræða raðhús eða parhús skal samþykki aðliggjandi íbúða (íbúðar) fylgja umsókn. Í fjölbýlishúsi, þar sem sérinngangur fylgir íbúðum, þarf samþykki allra íbúðareigenda. Afla skal samþykkis nýrra íbúðareigenda í húsum þar sem hundur er fyrir. Íbúðareigendur geta skriflega afturkallað samþykki sitt. Við aftirköllun samþykkis eða synjun nýrra íbúðareigenda skal gefa hundaeiganda hæfilegan frest til að finna hundinum annan samastað.

- i) Hundaeigendum ber auk þess að hlíta lögum og reglum er hundahald varða, þ.á.m. reglum um árlega hreinsun hunda og greiðslu hundaskatts, svo og fyrirmælum er heilbrigðisnefnd setur.
- j) Hundar, sem blindir eða sjónskertir þurfa á að halda vegna fötlunar sinnar og leitarhundar, eru undanþegnir greiðslu. Þó skal þeirra vegna greiddur kostnaður við hundahreinsun.
- k) Eigendum hunda, sem grundaðir eru um að vera smitberar, er skylt að hlíta því að hundar þeirra séu rannsakaðir, sé þess óskað af heilbrigðisfulltrúa, lækni eða dýralækni.

#### 4. gr.

Við brot á samþykkt þessari skal fjarlægja viðkomandi hund. Eiganda hundsins er skylt að leysa hann úr vörslu gegn greiðslu alls kostnaðar vegna brotsins, samkvæmt gjaldskrá sem staðfest er af heilbrigðisráðherra. Bæjarstjórn er heimilt að afturkalla viðkomandi undanþágu.

Sé hunds ekki vitjað innan tveggja daga frá því að eiganda var tilkynnt um handsömun hans, má aflífa hundinn, enda sé eiganda gert ljóst hvað vanræksla á að vitja hundsins getur haft í för með sér. Aldrei er skylt að geyma skráða hunda lengur en sjö daga frá handsömun. Heimilt er að aflífa hundinn að þeim tíma liðnum. Kostnaður greiðist af eiganda. Hættulega og óleyfilega hunda og þá hunda, sem ganga lausir utan húss, skal handsama og færa í geymslu. Heimilt er að lóga hættulegum hundum þegar í stað af þar til kvöddum yfirvöldum.

Handsömun á óskráðum hundi skal auglýst tryggilega, t.d. í útvarpi eða blöðum. Sé hunds ekki vitjað innan sjö daga má aflífa hann. Komi síðar í ljós hver átti hundinn má krefja eiganda um greiðslu kostnaðar.

Bæjarstjórn er heimilt, hvenær sem er, að afturkalla öll leyfi til hundahalds, telji hún þess þörf. Þá er bæjarstjóra heimilt að afturkalla leyfi fyrir einstökum hundum, sé þess talin þörf, en slíkri ákvörðun má skjóta til bæjarstjórnar.

#### 5. gr.

Starfsmenn áhaldahúss Sauðárkrókskaupstaðar annast eftirlit með hundahaldi í Sauðárkrókskaupstað samkvæmt samþykkt þessari og geta leitað aðstoðar lögregluþyrvalda þegar þörf krefur.

#### 6. gr.

Brot gegn samþykkt þessari eða reglum settum samkvæmt henni varða sektum, nema þyngri refsing liggja við að lögum. Með mál út af brotum á samþykkt þessari skal fara að hætti laga um meðferð opinberra mála og að öðru leyti í samræmi við ákvæði laga nr. 81/1988, VI. og VII. kafla.

#### 7. gr.

Framangreind samþykkt bæjarstjórnar Sauðárkróks staðfestist hér með skv. 22. gr. laga nr. 81/1988 um hollustuhætti og heilbrigðiseftirlit og 1. gr. laga nr. 7/1953 um hundahald og varnir gegn sullaveiki til þess að öðlast gildi við birtingu. Jafnframt fellur úr gildi samþykkt um hundahald í Sauðárkrókskaupstað nr. 162 frá 8. maí 1974.

*Heilbrigðis- og tryggingamálaráðuneytið, 24. febrúar 1994.*

**Guðmundur Árni Stefánsson.**

*Sólveig Guðmundsdóttir.*